

**Dissertatio inauguralis medica leges naturae in corporum productione et
conservatione ... / exponet ... U.G. Bucherus.**

Contributors

Bucher, U. G.
Hoffmann, Friedrich, 1660-1742.
Universität Halle-Wittenberg.

Publication/Creation

Halle : J. Gruner, 1707.

Persistent URL

<https://wellcomecollection.org/works/e3nq5v7n>

License and attribution

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection
183 Euston Road
London NW1 2BE UK
T +44 (0)20 7611 8722
E library@wellcomecollection.org
<https://wellcomecollection.org>

Q. D. B. V.

DISSERTATIONE IN AVGVRALI MEDICA

LEGES NATVRAE

IN

CORPORVM PRODVCTIONE ET CONSERVATIONE,

RECTORE MAGNIFICENTISSIMO,

SERENISSIMO PRINCIPE AC DOMINO,

DN. PHILIPPO WILHELMO,

PRINCIPE BORVSSIAE, MARCHIONE BRAN-
DENB. CETERA,

PRAESIDE

DN. FRIDERICO HOFFMANNO,

CONSILIARDO ET ARCHIATRO REGIO,

MEDICINAE ET PHIL. NAT. P.P. h.t.
DECANO,

PRO ADIPISCENDIS SVMMIS IN ARTE

SALVTARI HONORIBVS,

Ad D. XXII. Novembr. MDCC VII.

exponet

AUCTOR

VRBANVS GODOFREDVS BVCHERVS,
MISNICVS.

HALAE MAGDEBURGICAE,

Typis JOANN. GRYNERI, Acad. Typogr.

PERILLVSTRI DOMINO,

**DN. VVALTHERO
E H R E N F R I D O
ATZIRNHAUSEN,**

E QVITI LVSATO,

**DOMINO CLIENTELARVM KIESELINGS-
VVALDAVIAE ET STOLZENBERGAE,**

**SERENISS. REGIS ET PRINCIP.
ELECTORIS SAXONIAE**

CONSILIARIO;

**DOMINO SVO PERQVAM
GRATIOSO.**

PERILLVSTRIS DOMINE;

DOMINE PERQVAM GRATIOSE,

PERILLVSTRIS NOMINI LVO

Gratiam addet scripto, quam
per se non habet, Nominis Tui
splendor. Tanto enim uero illa erit
maior, quanto hoc in Chymia est il-
lustrius. Hoc orbis eruditus, hoc
ego in primis, paterque meus uene-
ra-


A 2

ramur. Eoque studiosius, quo prolixior est Tuus, Perillustris DOMINUS, in meos fauor. Neque hic aspernabitur animi piissimi, quantumuis tenue, monumentum. Id consecutus de testimonio constantis erga me uoluntatis mihi gratulabor,

PERILLUSTRI NOMINI TVO

Halae Magdeburgicae. R. M. R.
Dixii. Nov. CIO DCCVII.

Urbani Godofredi Bucheri
deuotissimus uenerator,
VRBANVS GODOFREDVS BVCHERVS.



LEGES NATVRAE

IN

CORPORVM PRODVCTIONE ET CON- SERVATIONE.

I.



Vm uiderim, Theologos in componendis controversiis prouocare ad Legem Diuinam, S. Codice contentam, Igitur uero ad Iura, placitis, et pactis gentium et ciuium introducta: equidem optauit semper, ut et Medicis Corpore quodam Legali, cui actiones suas in primisque curationem aegrorum conformare possent, instructi essent. Hi quidem Librum Naturae possident, in quo Deus rationem actionum illarum, quae tum in hoc uniuerso mundo, tum in nostro corpore citra uoluntatem nostram fiunt, quarumq; directio, et cura ad Medicos pertinet, expressit: ceterum, quamuis liber iste omnium pateat oculis, dolendum tamen, quod plurimos genuinus eiusdem sensus lateat. Hinc in expandendo hoc uolumine, loco Legum certarum, plerique hypotheses tantummodo fallaces rerum natu-

ralium tradunt, quae non ductum naturae, sed assumpta principia respiciunt. Vnde in illorum Systematibus Physicis non inuenias detectum processum naturae, quo in suis operationibus utitur; sed potius figura principiorum, et inextricabiles de iisdem disceptationes. Quodsi in causam huius propositi inquiras, uix reperias aliam, quam eorum in hoc studio ineptiam, qua, neglecto praecipuo rerum naturalium cognoscendarum principio, puta Experientia, Rationi tantum indulgent. Hinc ampliorem discurrendi campum attингunt, ubi de Principiis sermo est, quam, ubi de specialibus corporum naturalium operationibus loquendum. Verum Ratio, quo uagatur longius, eo semper magis a scopo recedit proposito, et a via ueritatis, cui nos insistere diuina iubet sapientia, ut cum Boissardo (*Theatr. uit. hum.*) loquar. Enim uero praestat, si missis, aut obiter saltem propositis rerum naturalium principiis, potius earum operationes perscrutemur. Certum enim est, Res ipsas nos ignorare, et Modos tantum rerum scire, hoc est, ea, quae accidunt rebus naturalibus, nobis esse cognita; in ipsam uero rerum essentiam, quae aeterna est nunquam nos penetrare, ut D. G. Morhofius philosophatur. Et quamuis illarum constitutio ex Mechanica, siue proportionata constructione fluat; longe tamen subtilior hic Mechanismus est, quam ut sensibus nostris percipi possit, multumque differt ab illo rudi, quem Mechanici manuales tractant, cuius fundamenta ex Mechanismo Animalium sumpserunt. Hic enim tractilium, et solidorum crassiorum, seu continuorum, ille fluidorum, seu contiguorum est. Ut ergo de priore egregiae uirorum doctissimorum demons-

monstrationes prostent: non tamen pari successu in posterioris rationem peruenire potuerunt. Neque mirum, quod eius demonstratio tantum laboris Physicis afferat, cum secretarum in fluidis operationum euolutio et cognitio maxime sit abscondita, atque inuoluta, quae sola tamen maximum Medico et Chymico emolumentum suppeditaret. Sufficit enim his Legem, & Processum Naturæ nosse, eumque cum in praeparatione medicamentorum, tum in eorum applicatione ad corpus humanum imitari, licet nullam aliam imitationis suæ causam possint reddere, quam ut effectum allegent contrarium, si alio, et contrario modo processissent. Quae methodus est Mechanicorum manuariorum, qua de causis laborum suorum nos edocent. Evidem Icti, applicantes actionem quandam ad legem, inquirere necesse habent in causam, et rationem legis, cui aduersatur actio, ut uideant mentem legislatoris, et, num ea difformis sit intentioni rei, obseruent: haec tamen ipsa demonstrandi ratio, a priori dicta, non locum obtinet in Physicis. Res enim naturales, seu potius processus, et leges naturae, nullam aliam demonstrationem admittunt, quam quae ab effectu, seu a posteriori procedit.

II. Ego autem, ut proprius ad propositum accedam, dixi, me expandere uelle Leges Naturae: ubi praemonendum duco, me uoce Legis non intelligere talia praecepta, quibus ad praestandas, uel omittendas certas actiones obligamur: sed indigitare Processum et Viam, quam Natura in suis operationibus elegit, et huc usque inde a condito orbe non interrupto ordine relegit, qui ordo diuturnitate temporis, ceu consuetudine, uti in ciui-

ciuilibus moris est, uim legis quasi obtinuit. Verum tamen tantum abest, ut Naturæ Opificem, DEum, illi ordini adstringamus, ut potius ab ipso positum et sanctum affirmemus. Non uero animus est nobis in omnes naturae operationes inquirere: non enim solitus ero de legibus motus animalium, quas Viri CL. firmis demonstrationibus explicarunt: neque perceptio- nis, et modi afficiendi corpora fundamentum eruam, unde animal uaria pathemata, uariosque gestus, et homo, accedente informatione, uoces distinctas, quibus ea, quae percepit, distincte aliis proponit percipienda, edit: sed illam tantum rerum naturalium affectionem peruestigabo, qua *oriri*, et *interire*, seu *generari*, et *perire* dicuntur, quae sui *incrementum*, uel *decremen- tum* capiunt. Haec enim Medico ostendit media conseruandi, et ab interitu vindicandi quaslibet corporis nostri partes, pariter ac modum parandi remedia, quibus opus, præscribit.

III. Iam in Constitutione, seu Generatione Corporis, duo consideranda ueniunt, nempe Constituens corporis, et Modus constitutionis. Prius est materia uariae indolis, cuius species, et differentias, gradibus distinctas, determinare non ausim. Recensent quidem Physici uarii generis materiam, ex qua tanquam ex prin- cipio, corpora naturalia composita fuerint, et in quae resolui possint: sed, quod ad primam eorum productio- nem attinet, erudimur ex sacris literis, Deum non ta- li modo processisse, ut componendo corpora ad se in- uicem rerum species produxerit; sed ex nihilo omnia, prout iam in uigore sunt, prodire uoluisse. Quae ue- ro de resolutione corporum in ultima sua principia qui- dam

dam iactitant, ea paucorum consequuntur fidem. Quicquid enim nobis ostendunt, illud non simplex, et homogeneum; sed maxime compositum esse, omnes produci illius, quod obtrudunt, affectiones ostendunt. Nam si Principia Chymica Paracelsi non de solo lapidem Philosophorum praeparandi mysterio intelligenda; sed ad omnium corporum naturalium alterationes, ignis, eiusdemque siue actualis, siue potentialis ope instituendas, extendenda sunt: illud quod ope resolutionis huius remanet, et salis nomine uenit, praeter sal uariae indolis, terram, et mucilaginem; quod autem auolat, seu in sublime attollitur, et Mercurius nuncupatur, praeter humidum, sal uolatile, et ramenta oleosa continet. Horum tandem uinculum pingue, uel unctuosum, sulphur dictum, quod ignem alit, et eo immisso consumitur, uariae quoque, ut ex corporibus patet compositis, est naturae. Non video ergo, quid obstat, quo minus asseram, tot, quot uidemus corpora, seu potius partes corporum, consistentia discrepantes, dari materias, cum non unum ex alio, sed singula seorsim a DEO sint creata. Habent siquidem particulae figuratas, seu formas suas originarias, quas nunquam deponunt, et si nonnunquam occultent. Licet enim Deus tantam corporum copiam non creauerit, quanta hodie reperitur: secus enim uerbum benedicti: Crescite, et multiplicamini uim, atque effectum suum non expleret: tamen certum est, quod tota telluris, in qua corpora crescere, et multiplicari cernimus, non augeatur moles, adeoque nouis constituendis impendatur. Quodsi enim, multiplicatis corporum naturalium speciebus, terrae, cui insistunt, pondus augeretur, ueren-

dum esset, ne ista reliquis, quae circumstant, sideribus praepondereret, adeoque motus aeterni leges uiolentur. Vnde error illorum patescit, qui sibi imaginantur, quod influxus siderum non solum alterando, sed quoque substantiam suam communicando, in his inferioribus operetur: quod ipsum assertum uti aequilibrationem mundi tollit; ita sufficienter ex iis, quae dicta sunt, dilui potest. Vere ergo Hippocrates (*L.I. de Diaeta*) dixit: *Nullum corpus perit, neque fit, quod prius non erat; uerum permixta, et discreta alterantur.* Homines autem putant, hoc quidem ex orco in lucem auctum generari; illud uero ex luce in orcum imminutum perire, ac corrumpi. Quicquid enim uidemus oriri, id non noua creatione factum est; sed remotione aliorum corporum, quibus obuolutum delituerat, in conspectum uenit. Vnde et terra non ubique singulis producendis apta est. Nam, ut Virgilius canit,

Hic segetes, illic ueniunt felicius uiae.

Sicuti itaque sufficiens particularum, quae in alimentum et nutritionem corporis cedunt, affluxus, et apparatus, ad molem corporis augendam facit: ita illarum defectus diminutionis, et ruinae corporis causa est. Hinc non mirandum, quod si alimentum inter plurima corpora distribuendum est, genuina eius segmina parcius conspiciantur: quod ipsum longaeuae corporis durationi obstat. Inde uix errauerim, si causam sterilitatis, et uitae breuioris animalium, nimiam partium extenuationem dixerim, et, quod plures inconuenientes admixtas habeant particulas. Vnde ex illarum mixtione tot noui morbi oriuntur, quorum typos nulla superior cognouit aetas.

IV Circa Materiam corporum illud ueterum disserimen probe attendendum, quo distinxerunt eam in Atomos, et Semina, quorum illas Cl. Io. Christoph. Sturmius Materiam inorganicam, haec uero organicam appellat. De priori specie hoc loco potissimum erimus solliciti, quandoquidem illa in primis facit ad corporum constitutionem, quam hic explanare decreuimus. Sed cum tamen doctrina de generatione Seminum, quae in Animalibus nomen ouorum habent, ea, quae iam de mole dixi materiae, quodammodo illustret, pauca et de eadem proponam.

V. Duae uero sunt praecipuae opiniones de ouorum in animalibus generatione, quae ceteroquin non minus de uegetabilibus sunt intelligendae. Alii autem inuolutionem ouolorum statuunt, et, progrediendo ad inuolucrum primum, totum genus humanum in Euae ouario latuisse dicunt, ex quo noua hominum progenies, ceu dentes ex alveolis, cornua, et unguis ex tuberculis seu bulbis cranii et tendinum, et pedes cancrorum ex acetabulis, imo, ceu germen ex germine, emerserit. Quam sententiam, tametsi alii omni rationi contrariam pronunciant, et, collata inter se multitudine partium corporis nostri, atque angusto, quod ouulum describit, spatio, risu explodunt: non tamen, ut pro impossibili habeam, egomet facile adducor. Nam sicut intellectui meo non patet terminus, quando corpus aliquod est augendum, sed augmentatio haec in indefinitum extendi potest: ita eiusdem diminutio in infinitum potest contrahi, aequa ac ratio multiplicando res in infinitum auget, et e contrario diuidendo in infinitum minuit. Nec ex uano, opinor, dixerim,

hanc doctrinam dogma fidei de resurrectione rationi nostrae quodammodo perspicuum reddere. Cum enim moles telluris non augeatur, uti antea demonstrauimus, sed in generatione rerum materia saltem permuteatur, ita, ut etiam nutritio animalis, ob transpirationem perennem, continua dicatur generatio atque mors: homo sane resurgens non posset cum Iobo carnem suam propriam uocare, nisi a tota mole corporea aliquid superesset, quod alia corpora non fuisset ingressum, quod ipsum in ouulo praeexitisse probabile est. Nec est, ut risu excipias exilitatem corporum nostrorum, quae hinc sequeretur. Nam, quod et haec exigua nostri portio clarificando corpori nostro sufficit, pio motu sum persuasus. Quam in sententiam conf. D. Bern. Connor, in Euangelio Medici.

VI. Altera sententia ingeniosissimi Philosophi, Becheri est, quam *Physic. subterr. L.I. Sect. IV. Cap. IV.* exhibet, et quae in Hippocratis, summi Physici, iudicio fundatur. Hic enim Libro de Aere, Aquis et Locis dicit, *Semen genitale procedere ab omnibus corporis membris.* Haec itaque segmenta, et atomi omnium corporis nostri partium in ouis quidem infoecundis confuse iacent; accedente uero genitura uiri, lympha, cui immersae sunt, rarefit, et atomus quaelibet ob gravitatem determinatam certum locum occupat. Interea uero, dum nondum firmiter cohaerent, atque compactae sunt partes embryonis, leui causa, et sola imaginatione matris facile possunt deturbari, ut inde defectus partium aut menstruum aliquid exsurgat.

VII. Sed sufficiat haec breuiter monuisse de initio productionis corporum animalium atque uegetabilium,

id

id est, de generatione ouulorum et seminum. Nec enim ex instituto de hoc argumento agere constitui. Agam uero pluribus de materiae seminalis impraegnatae corporum augmentatione, quam uulgo extensio nem appellant. Haec autem extensio duplicis est generis, alia nempe Nutritionis, quae animalibus; alia Vegetationis; quae uegetabilibus competit. Vtraque tamen eadem ratione, quo Mineralium generatio, nempe accretione atomorum procedit, aequa ac mors et interitus priorum nihil aliud est, quam partium resolutio. Et hic est Modus constitutionis corporum, idemque alterum, et primarium Tractationis nostrae mem brum, qui modus non solum ab Hippocrate, Libro de Diaeta, traditur, ubi *commisceri* idem est, ac *generari*, et *discerni* idem, ac *perire*; sed ab omnibus quoque antiquis Philosophis, qui quidem de causis mutationum, generationum, et corruptionum Physicarum commen tati sunt, unanimi sententia fuit obseruatus. Horumque primus memoratur Mochus Phoenicius, quem ante Troiae excidium, adeoque ante ipsum Hippocratem, floruisse referunt Historici. Is enim hanc de genera tione, et corruptione habuit sententiam: *Corpora naturalia gigni atomorum, seu corpusculorum insectilium οὐγόποις; interire earundem diauxpīσει; uariari eorundem diuersa dispositione, atque ordine.* Quemadmodum enim ex uiginti quatuor literis, uarie coeuntibus, omnis dicti onum uarietas existat: ita ex hisce atomis in rebus naturalibus omnem oriri mutationem arbitratus est, referente Io. Scharffio, *Phys. Recogn.* Mochum secuti sunt Leucippus, Democritus, Epicurus, Lucretius, Anaxagoras, aliique, et inter recentiores ex parte Petrus Gas sendus, qui in *Physica* sua uideatur.

IIX. Vnde ergo unius generis particularum corpus facit apparere; illarum uero seiunctio disparitionis eius causa est. Quoties enim materia quaedam interuentu aliis seiuncta reperitur, toties sensuum nostrorum iudicium fugit, qui non, nisi de congestis, et mole conspicuis iudicant. Sic in herbis ex sapore non percipimus sal, quod, combustis, et igne dissipatis comprehendibus, quae illud distraxerant, ex iis elicetur. Nec radii, dehiscentes a corporibus, et per aera protensi, conspiciuntur, nisi interuentu diaphani crassioris iterum colligantur.

IX Causa unionis, et cohaesionis particularum est homogenea, et aequa earundem quoad molem, et superficiem constitutio, qua sui iuris factae, et fluido rarefacto innatantes, sedato rarefactionis motu, coeunt, et inuicem arcte combinantur, atque in hoc nexu, accedente aere, extrinsecus comprimente, tam diu conservantur, donec ui noua dirimantur. Videmus hoc in pulueribus uariae crassitie, aquae immersis, quae, moto uase, aquam continente, primum confuse circumgyrantur, cessante uero hac motione, eo ordine subsidunt, ut crassiores fundum petant, reliquis iuxta gradum molis suae his superstratis, quam cribrationem uocat Philosophicam Robertus Boyle, *de Utile. Phil. Experim.* Eodem modo dum agricultae, grana frumenti a paleis separantes, illa his permixta uentilabro proiiciunt, singula huius mixti genera coniunguntur, et pro sua grauitate loca, diuersis interuallis a dispergente protensa occupant. Ex quibus patet, quod similitudo corporum sola causa sit coniunctionis intimoris, cuius ratio non in sympathia quadam, et amore

mu-

mutuo. quo ad se inuicem rapiantur, sed tantum in grauitate eorum quaerenda. Propter hanc simile petit simile, nullo instinetu alio, quam ui ponderis sui impulsum. Necesse enim est, ut, si uarii generis, seu diuersae molis corpora mota aliquo tendant, singula pro uarietate molis sua citius, uel tardius eo, quo uergunt, ueniant. Idcirco eiusdem molis particulae, idem temporis spatium cursu suo absoluentes, locum eundem occupant, dum desinunt moueri.

X. Deinde ad hanc unionem plurimum confert aer circumstans, et particulas probe cohaerentes coercent, qui e fissuris corporis, ope fluidi illius, cui immersae erant particulae, exclusus, totius compagis contextum premit, et, ne dehiscant, et corruant, praeferuat. Patet hoc in coniunctione duorum planorum, arte combinatorum, quod in marmoribus demonstrauit Boyle: et, intercedente medio, nempe mercurio uiuo, applicationem folii metallici ad uitrum, in conficiendis speculis fieri uidemus. Hoc quippe fluidum terreum, folio metallico superfusum, aerem excludit, dum artifex uitrum apte protrudendo submittit.

XI. Hae fuerunt causae constitutionis, seu generationis corporum; corruptionis uero sunt Fluida uaria, quae contextum corporis, poros eius subeundo, diuellunt. Duplici uero modo agunt in corpora. Vel enim laxant compaginem eius, atque ilud constituentia successiue, citra illorum dissipationem, dirimunt, id quod potissimum ab Aqua fit: uel ui et impetu quasdam discerpunt particulas, easque protrudendo ruinam corporibus pariunt, id quod ab Igne fieri obseruamus, siue sit actualis, et luculentus, siue potentialis, per falia,

aqua

aqua soluta, acquisitus, cuius ignis tamen uis multo sedatior et mitior existit.

XII. Eadem tamen Fluida sunt quoque Media, quibus connexio, et coniunctio particularum perficitur, et commodum praebent uehiculum, quo partes ad constitutionem corporis requisitae, deferuntur: hoc tantum obseruato discrimine, quod pabulum producentorum corporum, in his sufficienti copia latens, exuperet tum uim, mouentem fluidum, tum heterogeneas, et coitionem renuentes particulas. Ipsum enim Fluidum etsi uacuum est omni heterogeneitate, si continue moueatur: accessum tamen partium homogenearum ad se inuicem impedit, uti obseruamus in crystallisatione salium, quae non procedit, nisi solutio quieti reponatur.

XIII. Sed exponenda iam uenit uis illa mouens Fluidum, quae medium hoc unionis, et resolutionis dirigit, uel saltem in fluore conseruat. Hanc uim licet diuersam primo intuitu concipiamus, unam tamen, eandemque semper esse, et diuersas tantum facies a mediis diuersis, effectum eius adiuuantibus, uel retardantibus, induere obseruamus. Est uero calor, quem Ignem Naturae ueteres, recentiores uero aetherem rarafactum appellant. Hic aquam dimouet, et diluit, ne frigore concrescat, eique calefactae diuersos caloris gradus communicat: idemque rarefaciendo aerem crassum, pressum eius a corporum lateribus submouet, et arcet, ipse uero, propter obstantes diuersas corporis resoluendi, uel additi adiuuantis, materias, modo penetrat, modo supprimitur: unde confusus particularum motus subsequitur. In hoc ipso uero motu, et lucta,

lucta, illae, quae reliquias numero superant, coeunt,
atque coniunguntur.

XIV. Calor hic a sole est, qui, rarefaciendo ae-
therem, corpora omnia, quae quidem permeat, ca-
lificat, peruidendoque in fluorem redigit, minima
eorundem, a se inuicem secedentia, continuo agitan-
do. Quemadmodum igitur aether interpositione
aeris crassionis uarie densari, adeoque calor tempe-
rari potest: sic idem coniunctione corporum non-
nullorum intenditur, atque augetur. Sunt autem il-
la, quae arctiorem contextum habent, et unctuosita-
te sua nulli alii, quam aetheri, aditum permittunt.
Hac enim uiscositate aether in transitu rectilineo de-
tinetur, et uarie cursum suum flectendo augetur. Vn-
de corpora uiscosa commodissimum flammae alien-
dae pabulum praebent. Hoc uero praestant sulphu-
ra, bitumina, resinae, olea, pinguedines, et quic-
quid inflammatur. Quae licet et alia admixta habe-
ant: omnia tamen in unctuositate hac, et tenacitate
conueniunt. Aetheream illorum originem, seu com-
plexum, probat elatus, quem in mistione cum flui-
dis occupant, locus. Vnde illa corpore tenuissimo,
minimoque ponderi obnoxio, referta esse, patet. Et
quamuis inflammabilia mineralia, aquis iniecta, sub-
fidant, ob nimiam partium terrearum, immo metal-
licarum, coniunctionem, et absorptionem: tamen in
eo conuenientiam cum his produnt, quod ope de-
stillationis tota ferme, licet mutata forma, et sub spe-
cie salis acidi, phlegmate soluti, euehantur. Et licet
spiritus hic acidus, ex iis impetratus, inflamma-
ri nequeat, non tamen caret ui urendi, quae non-

nunquam tanta est, ut cauteriorum actualium vicem possit supplere. Inde non immerito aetherem incorporatum sal acidum dixeris, quod eosdem effectus via humida peragit, quos flamma, aut inflammabilia via sicca praestant. Et licet aquae inditum, illam per se non calefaciat, tamen additione salis acris, notabiliter dimotionem, imo calorem ei inducit.

XV. Atque in eo posita est ratio Fermentorum, quibus motus corporum in Fluido crassiori, seu massa pultacea adiuuatur, utpote quam duo haec salia contraria ingrediuntur. Nimirum Sal Acidum est terra clarificata, seu diaphana, in aqua solubilis, aetherem detinens, atque concentrans : Sal Acre uero est eadem terra pellucida corporum uariorum, quae, priore, ope fluidi aquei coniuncta, eius contextum dirimit. Vnde aether, priore inclusus, diffractis repagulis, totum Fluidum, cui immersum utrumque sal est, peruidit, illudque uarie impellendo mouet. Hic motus, si plures terreae resistentes particulae Fluido insunt, Fermentatio : sin uero purius sit fluidum, Effervescentia nuncupatur. Causa, cur agant isthaec salia in se inuicem, non alia est, praeterquam contactus mutuus, et intensus, ope aquae inductus. Vnde sal acidum dimittit, quicquid aetheris continebat. Sicuti enim sulphur aut pinguia augent aetherem, eumque miscent aeri, dum uincula unctuosa, quibus detinetur, dissipata humiditate, collabuntur, atque consumuntur : ita sal acidum auget, et infert aetherem aquae, seu massae pultaceae, dum huius contextus prius a sale acri fuit diremptus, quod coniunctione, seu coitione illorum ipsorum, uti iam dictum,

con-

contingit. Requiritur uero tale menstruum, seu fluidum, ad destructionem, quale ad productionem erat necessarium: qui processus in omnibus naturae operationibus obseruatur. Nimirum, si mixto soluto additur corpus nouum, menstruo decente solutum, hoc miscetur homogeneis partibus, ceteris, priori innatantibus, ad fundum praecipitatis. Sic, quando lacti, quod nihil aliud est, quam oleum, seu pulpa, aquae mista, immittitur sal acidum, tunc sal acre, cuius beneficio pulpa intime aquae unita erat, illud aggreditur, unde aqua illam sub specie humorum dimittit. Simili modo pars oleosa attenuata spiritus uini ex uegetabilibus, aliisque extrahit, quicquid inflammabile in iis reperitur: et, dum uictu implemus corpus, lympha uentriculi, saliuia, et reliqui in canalem alimentorum effusi liquores, absorbent, et sibi adiungunt illud, quod suae naturae est, et ob proportionatam superficie in facile cohaeret. Inde, si prauis humoribus corpus scatet, tales quoque particulas, e massa ciborum discerptas, sibi associant, quae aliquin cum fecibus aluinis praecipitati, et e corpore eliminati fuissent. Manifeste hoc uidemus in generatione calculi in uiis, quas perluit lotium, aliisque corporis locis, in quibus lapidosa eiusmodi materia non concrescit, nisi prius crassius quoddam corpusculum paulo diutius fuerit retentum, quod sensim sensimque diuerfis crustis, seu inuolucris obducitur. Nec raro contingit, ut fermenta, ob uigorem fomitis sui, puta humoris acido-acris, ceu cuiusdam luctatoris, quicquid noui succi affluit, subigant, et, si non augmentum inde capiant, tamen omnem eius

uim eludant, illudque destruant. Quare saepe tanta eorum acrimonia est, in primis in ulceribus narium, aliisque cancerosis, ut aquam regiam aemuletur, neque, nisi auro, saturari, et infringi possit.

XVI. Ut igitur duum generum fluida habemus: humidum et siccum: ita pariter duplex generationis ratio est, nempe humida, et sicca, siue, ut Chymici loquuntur, per viam humidam, et secundam. Prior inodus placidus est, atque naturalis, quippe quem natura in plerisque suis operationibus adhibet: posterior magis uiolentus, et plurimis corporibus destructius, dum gradus non obseruat, quibus natura in productione corporum adstricta est, sed faciendo saltus immutatione corporum momentanea, quasi ui quadam ex iisdem elicet, quod, sibi relicta, successiue praebuissent. Prior modus instituitur in Aqua, quae, siue pura, siue uario salium genere armata est, Menstrui nomen accepit a Chymicis: posterior fit Igne actuali, seu flamma, aucto simili- ter motu eius additione salium, quod in cmentatione contingit. Communis uero utriusque modi finis est remouere obstacula, quibus minima corporis desiderati detinentur, et non raro occultantur, quo, disiectis hisce, in lucem et conspectum protrahantur: quam productionem Generationem dicimus. Remouentur uero, dum, ut dixi, applicato medio fluido, in quo, adiuuante calore, compagi corporis conformi, solutintur, et uel menstruo coniunguntur, uel ab eo excluduntur, et praecipitantur, uel in auras disperguntur, et uase excepta sublimantur.

XVII. Ut legi huius naturae ueritas eo melius patet, examinemus quaedam Artis, et Naturae produc-

cta,

Et a, eorumque producendorum modum. Ita uero, omnia se tali modo habere, et ubique nihil, nisi permutationem partium esse, constabit. Sic, si desideramus sal uolatile acre, siue siccum, siue phlegmate solutum, quo partes animalium, praecipue durae, et uegetabilia quaedam abundant, in quorum tamen oleis aequa, ac animalium partibus mollibus, et gelatinosis, nimis attenuatum est, illud e consortio reliquarum partium tribus modis excluditur, dum niempe uel putrefactioni exponimus mixtum, ubi a motu contrariorum, adiuante aere externo, exhalat, foetore se prodens: uel uno impetu contextus immutatur igne, seu combustionē, unde eleuatur atque sublimatur: uel tandem absorptione acidi, a quo facta fuerat attenuatio, eiusque praecipitatione sui iuris euadit. Cumque olea cum acidis pari passu ambulent, hinc et ex illis idem sal uolatile acre elicere eo modo contendunt Chymici, quamvis plerumque labore frustraneo, ob nimiam salium istorum in oleis attenuationem. Adhaec in tanta copia in iis reperiuntur, ut sua uirtute superent inuolucra, quae disiicenda, et immutanda erant. Quo fit, ut eosdem effectus, quos acria pura edunt, producant. Atque his modis procedit sublimatio.

XIIX. Inter producta Praecipitationis occurruunt calcinata, et salia, quae, igne consumptis eorum compendibus remanent, uel per se usui adhibenda, uel debito modo purificanda: id quod in productione salium requiritur. Nonnullis mixtis, quibus hic modus applicatur, additur absorbens, ut ab acido liberentur, siquidem producta eius mere sunt alcalia. Videmus hoc in fusione regulorum metallicorum, et metallorum a se in-

uicem separatione. Minerae enim sunt terrae, scaten-
tes succo acido, qui ramenta, quae illae continent, me-
tallica discerpsit. Dum ergo terra haec, quae in Anti-
monio sulphuris nomen induit, ab additis salibus, pra-
cipue nitro, quod inter oparandum fixatur, absorbe-
tur, particulae metalli liberantur, et, cessante motu i-
gnis, terram illam in fluore conseruantis, ex hac detur-
bantur, et coniunctim in fundum coni fusorii, uel ua-
sis, in quod massa infunditur, delabuntur. Ex quo e-
lucet, metalla alcalicae esse naturae, dum non modo
eum, quem acria praestant, effectum in corporibus e-
dunt, uti hoc paulo ante de auro demonstrauimus; sed
etiam easdem, quas acria, mutationes subeunt. Non
enim tantum eadem uia e consortio reliquorum extra-
huntur, sed aequae, ut illa, attenuari possunt; siquidem
mercurius uiuus nihil est aliud, quam metallum, ab a-
cido subtili attenuatum, quod aequa cum oleis destilla-
tis fortuna gaudet. Nam licet et in mercurio ab acido
facta fuerit metalli, uti in oleo salis acris, solutio, cuius
beneficio calore in sublime tollitur: tamen praeponde-
rat metallum solutum, quod non tam grauitas, quam
effectus prodit, dum acidum aequae, ac olea destillata,
absorbet. Imo oleum uitrioli, spiritum uitrioli absor-
bens, hoc ipso indicat, quod nihil sit aliud, quam uo-
lumen ramentorum metallicorum, quibus minerale il-
lud, ex quo summa ignis uiolentia expressum est, abun-
dat. Et sicuti fidis obseruationibus constat, quod me-
talla, in primis aurum, ex filiceo uinearum fundo, ope
succii uitis nutritii extracta, atque euecta, uuarum aci-
nis se admiscuerint, imo in mineris, instar uegetabilis
efflorescentis reperiantur: ita ars eadem metallu-
sce.

scere facit , uelut Arbor Philosophica id ipsum demonstrat.

XIX. Videamus iam tertium genus productorum artis , a natura adiutae. Sunt illa , quae fermentorum more augmentur , et Fluido innatant , ut Extracta , Tincturae , Essentiae , et id genus alia. Atque hoc modo potissimum incrementum capere uideamus acida , et iis convenientia oleosa , seti inflamabilia , quibus addenda sunt uiscosa , et quae facile sibi cohaerent , licet maxime mista sint , et ex plurium generum partibus constent , ut sunt pulpa uegetabilium , gelatina animalium , concreta lapidosa , et alia , quorum augendi modum supra ostendimus. Ut haec coire possint , requiritur blandus fluidi illius , beneficio cuius particulae coniungendorum deferuntur , motus , qui calore inducitur , siue extrinsecus , siue intrinsecus per fermenta foueatur. Immo , etiam solo externo , et mechani- co , seu manuali motu coniunctionem fieri , in confectione butyri uideamus , licet.

XX. Ultimus hic corporum producendorum modus obseruatur non tantum in Concretione , sed praeterea etiam in Nutritione , et Augmentatione Vegetabilium , atque Animalium , prioribus tamen modis non penitus exclusis , praecipue , ubi alimonia in primis , quod dicitur , uis praeparanda est. Quam augmentationem licet supra in explicatione fermentorum quodammodo exposuerimus : tamen hic paulo fusius describemus. Cum primis autem hic requiritur sufficiens alimenti apparatus , in animalibus quidem satis conspicuus , utpote quae eius defectum non diu absque interitu sui ipsorum tolerare possunt. Sed , si uegetabilia respi-

respiciamus, mirari subit, unde tantum incrementum accedat, cum exempli causa, quercus annosa tantae proceritatis, et molis sit, nec tamen ullum terrae, cui insita est, decrementum fentiatur: nisi quod illam plurimum nutrimenti ex atmosphaera, quam Panisperniam ueteres nuncuparunt, capere probabile uideatur, quae cum rore deciduo ad radices eius defertur. Maxime, cum uideamus, semina frumentorum, terrae commissa, tanta ubertate foenus non deponere, nisi ager emaciatus certis annorum interuallis fimo fuerit foecundatus, qui ramenta straminea, excrementis animalium macerata, et discerpta, germinanti plantae maiori copia communicat, ut haec caulem spissiorem aere, pluraque grana protrudere queat. An uero tota planta concisa, et ab admixtis inconuenientibus depurata, et deinde decenti caloris gradu fota, iterum absque seminio, solo artis beneficio, (quod praecipue in separatione principiorum eius, seu partium genuinarum ab alienis, earundemque coniunctione consistere dicunt) possit produci, in ea quidem re, experientia destitutus, nolim certi quicquam definire. Evidem non repugnat palingenesia haec legi, et ordini Naturae, quem in generatione seminiorum obseruat, uti ex Bechero supra tradidimus. Eudem productionis processum inuenimus etiam protensum ad genus animalium, dum similia de generatione anguillarum, cancrorum, et uel maxime insectorum legimus. Quin et nonnullorum curiositas dicam, an uesania, eo processit, ut ipsum hominem hoc modo renouari, uitamque eius, denuo repetendam, prolongari posse, sibi fuerint imaginati. Ceterum haec dubiam redderent Physis hodiernis eam, quam

quam de generatione aequiuoca alunt, sententiam, in primis si per eam talem tantum intelligent, ubi deficit seminum. Sed, utut in eo quidem ueteres falsi sint, si putarunt, nihil de noua insectorum progenie, quod eius naturae fuerit, praeextitisse, cum omnia ferme terrae spacia inconspicuis insectorum seminibus conspurcata, non addam, atomis ipsorum, post mortem residuis, referta sint, unde illa facile udo solis calore excitari, hae uero coire possunt: attamen conatus eorum laudandus, dum interiora rerum rimari, quam circa corticem, et testam uersari, et de ea inuenta laetari, consultius duxerunt.

XXI. Verum enim uero reuertamur, unde non nihil digressi sumus, ad Nutritionem Vegetabilium, atque Animalium, quae, uti saepius dictum, fermentorum more, nempe appositione partium, absoluitur. Ovulum nimirum, seu seminum, quod est uolumen particularum, a corpore deciduarum, uesiculis intrusum, uel ab aere externo ambiente crusta obductum, concludit omnem corporis constituendi apparatus, qui tamen nec iusto ordine est locatus, nec ob admixtam lympham spissiorem, uel pulpam commoueri aptus est: accedente uero calore, qui in vegetabilibus a sole, adiuuantibus salibus fimi; in animalibus a fermento masculi genitali, tenuissima quoque partium ramenta procul dubio continente, sustentatur, inducitur materiae seminali motus partium. Exinde, ut supra monitum, quaelibet suum locum occupat, et ex lympha, uel pulpa rarefacta, seu emollita, sibi nutrimentum decerpit, donec embryo, aut germen, ob molem, uel defectum alimoniae, receptaculum frangat, et maioris mundi a-

lumen fiat. Apte uero collocari possunt, durante fermentatione, minima in ouulo, dum crux externa obstat, quo minus impressionem alius corporis moti recipere, indeque perturbari possint, quo propignaculo postea opus non habet foetus, ubi, adepto uigore, ipse sufficiens est, alimento praeparando, et admixtis huic incongruis subigendis. Potissimum uero duarum istarum Naturae specierum, nempe Vegetabilium, et Animalium, constituens est terra fibrosa, florium instar villosa, quae ab admixtis aliis uarias induit figuram. Sic per se contorta eiusmodi filamenta constituunt nervos, et fibras alias; contexta praebent membranas, quae conuoluta efformant canales, et ductus; aquae immersa, et subacta generant lympham, quae si inspissata est, uocatur gelatina; sin partibus aliis crassis, et salinis, pinguisque scatet, sanguis est. Gelatina uero, fibris intrusa, conficit carnem; crassioribus autem, et salinis mixta, atque humiditate priuata, ossibus formandis inferuit. Ceterum huius terrae fibrosae minima ramenta, humore imbuta, aetheris transitum retardant. Profinde ob anfractuosos meatus ille implicatur, et ramenta illa largiori, quam alia corpora, copia implet, constituitque olea, quae, folliculis membranaceis inclusa, pinguedo dicuntur. Atque eodem modo partes vegetabilium moliores, et durae, friabiles, et fissiles constructae sunt, et illud saltem generale discriminem admittunt, quod crassioribus salibus, aliisque abundant, cum in animalibus, ob fortiores resolutiones, et attenuations, ista cum reliqua substantia longe subtiliora, magisque subacta existant.

XXII. Atque ita sufficienter, quoad quidem eius fieri a nobis potuit, explicatam esse Corporum Productionem puto. Restat igitur modus conferuandi corpora, quem natura arti concessit. Itaque conservantur corpora in esse suo iis, quibus constant particulis, ubi ueterum canon obtinet: *Similia similibus conservantur.* Iisdem ergo defectus, si quis subest, suppletur. Quodsi uero toti admixtum fuerit contrarium, ruinam minitans, tunc ii mutationum corporum modi in auxilium uocandi et adhibendi sunt, quibus illius, quod disconueniens, & noxae est, exclusio perficiatur. Sunt illi dissipatio noxii in auras, et eius praecipitatio, seu detrusio. Ne nero nimis generali tractatione, habito respectu ad singula Naturae regna, obscuri uideamur, corpus tantummodo nostrum curandum contemplabimur, solicii non tam de morbis, quam morborum causis.

XXIII. Primo itaque in corpore nostro occurruunt partes fluidae, quae et corruptioni magis sunt expositae, et noxiam ad solidas deriuant. In his uero frequentissimum est acidum peccans, dum non modo liquida illa, quæ assumimus, singula, acorem contrahunt; sed et sanguis, fons omnium humorum, cum nihil aliud sit, quam Chylus, hoc est, lac digestione rubefactum, raro naturam suam deponit; uerum latetis instar facile acescit. Vnde non per setantum dolores uarios in partibus nervosis excitat, et condensando sanguinem, uellympham, ductus corporis nostri obstruit; sed et admixtum salibus heterogeneis scorbuticorum, et cacockymicorum, nouis fermentis generandis ansam praebet, quae, motuum fangi-

D 2 nis

nis uitalem subigendo, in legem sui motus abripiunt,
 quod in febribus continuis contingit: imo partes so-
 lidas inuadunt, illasque uigore suo priuant atque ex-
 ulcerant, quae ulcera, partem quandam, in primis
 tenuem occupantia, totam sanguinis massam acri-
 bus particulis imbuunt, eamque et nimium atte-
 nuant, et, solidarum partium consistentiam, consu-
 mendo, earumque pabulum conterendo, totum cor-
 pus extenuant, et tabescere faciunt. Itaque uelut ult-
 timorum horum symptomatum causa est humorum
acrimonia: ita priorum faber est aciditas, quae ab-
 sorbentia in cura requirit. Cum tamen ea ipsa non
 unius sit generis, quandoquidem diuersam depre-
 hendimus in succo citri, berberum, ribium, diuer-
 sam in aceto uini, hordei, tritici; diuersam denique in
 spiritibus, acidis, et aquis stygiis: ideo diuersa quo-
 que ad illam destruendam remedia requiruntur. Sic
 in dysenteria tanta interdum canalem alimentorum
 occupauit acrimonia, ut non secus, ac mercurius
 sublimatus, crystallo montana uelit domari. Sed
 cum species acrimoniae, peccantis in corpore, diffi-
 ciles sint cognitu, propterea non immerito pulueres
 bezoardicos tot absorbentium species ingrediuntur,
 ut ex hac multitudine acidum sibi conueniens, uel
 contrarium eligere possit, in quod, elusis reliquis,
 agat. Nec inepte, ut quidam uolunt, auri folia iis
 admiscentur, quorum effectum in ulceribus, aquae
regiae acrimoniam redolentibus, supra indicauimus.
 Attamen uim auri, quam nonnulli iactitant, uni-
 versalem non percipimus, licet eam Medicum quen-
 dam, qui inter alia arcana aurum amalgamatum
 the-

theriaca , tincta santalo , et in pilulas efformata , occultabat , uenditasse haud ignoremus . Non tamen semper pura adhibita absorbentia uoto Medici respondent , sed incitamento salino , aliquo interdum opus habent , illo cum primis tempore , ubi uisciditas , et lymphae stagnatio adest , quam sola diluentia diffrikingere nequeunt . Porro nunc fixa magis , nunc uolatilia eliguntur , si forte altius pertingere , atque cito ad extima corporis peruenire debeant . Et , quod sigillatim ad salia uolatilia attinet , illa , pro ratione subiectorum , modo simplicia , modo oleosa requiruntur .

XXIV. Econtrario , ubi nimia acrimonia obtundenda est , qua humores , ultra modum resoluti , et refacti , ebulliunt , atque liquefcunt , tunc acida in auxilium uocanda sunt , eademque modo fortiora , modo debiliora , nonnunquam acribus saturata , quae salsa uocant , non neglectis conglutinantibus ostracodermis . Haec acida , amaris potissimum , seu terreo-salinis sociata , tonum fibrarum roborant , dum nimiam , quam imbiberunt , humiditatem , unde laxantur , absorbent , atque exsiccant . Atque horum medicamentorum omnium operandi ratio in eo consistit , ut mixta prauis humoribus corporis nostri hosce inuentant , et noxium uel per insensibilem transpirationem , aut manifestum sudorem expellant : uel precipitando cum reliquis fecibus deturbant .

XXV. Qui uero partes solidas obsident morbi , hac eas ratione inuadere , ac uigore suo priuare solent . Nimirum sanguis , omnes partes perluens , in motu suo progrediente impeditus , idque uel a causa

interna, tubulos obstruente; uel externa, illos comprimente, aut dilacerante, circa partem illam, ubi laesio facta, stagnat. Vnde ab affluxu insequentis cutis eleuatur, qui tumor, grumos sanguinis coagulati concludens, si per interna, et externa resoluta discuti nequeat, putrescit et exulceratur. Atque hoc ulcus si leuius est, nec cum distorsione fibrarum, et ossium conquassatione coniunctum, facili negotio a sana parte abscondi potest: quam in rem per digestua, uti vocantur, mucilaginosa, perspirationem, et irresolutionem concreti sanguinis impeditia, putredo carnis promouetur. Ipse enim sanguis, liberatus ab hac remora, resarcit carnem, non secus, ac in vulneribus, et ossium fracturis, inducendo callum, separata coniungit, si modo obstacula, reunionem impeditia, remoueantur, applicatis balsamicis, acorem corrigentibus, et impositis, quae aerem arcent, munimentis. Quod si uero pessimae iam recensitae circumstantiae corpus calochymicum attingant, aut exulcerationis cura protrahatur, tunc fermentum putridum, ancto pabulo, proserpit, et, praeter sphacelatas, uiuidas ac sanas corporis partes, non raro cum totius hominis internecione, peruadit.

Nobilissimo Domino

CANDIDATO

S. P. D.

FRIDERICVS HOFFMANNVS, P.P.

LIcer multa sint, quae medicum ornare atque commendare possint, nihil æque tamen eundem adiuvat, nihil decorum magis ipsi est, quam pulcherrimum illud scientiæ genus, quod immensum illud naturae amphitheatrum nobis contemplandum proponit. Hujus enim beneficio abstrusa corporum nobis patent, abditarum rerum causæ eluent, totius denique naturæ opes nobis explicantur. Quæ cum medicum in primis scire expediat, quod hic minister sit naturæ, hinc de facili adparet, quam eximium lumen Physica medicinæ præferat, in eritoque inde ejus oculum adpellari. Nisi enim intra hujus contubernium quis versatus fuerit, nisi hujus præceptis fuerit innutritus, næ ille parum recte in doctrina medica proficiet, & in spissa caligine ac tenebris oberrabit. Quo magis enitendum reor omnibus, qui salutari arti sese dediderunt, ut Philosophiæ & Physices maxime præfidiis confirmati ad medicinæ studium transeant, quod hujus summum in re medica sit decus, necessitas par. Fuit & hoc Tibi semper propositum, *Nobilissime Domine Candidate*, ut omissis ceteris, quæ parum utilitatis promittunt, naturali in primis scientia ani-

animum excoleres, quippe non obscurum Tibi erat,
sine hujus ope in medicina omnem plane industri-
am sinistre collocari. Cujus quidem rei testimonio
esse potest præsens Dissertatio, quam ex fontibus
physices eleganter deduxisti dato ingenii, quod per sa-
tis longum tempus in ejusmodi studiis exercuisti, ex-
perimento. In quo quidem illud in primis mihi laude
dignum videtur, quod Tui ingenii labor sit, & ut
Tuus maneret, nec adjeci ego quidquam, neque com-
mutavi. Gratulor interim Tibi, *Nobilissime Domine*
Candidate, primum de hac eruditione, deinde
etiam de ipsis honoribus, proxime Tibi conferendis.
Faveat porro DEus suis muneribus, quæ concessit
Tibi, & det, ut ad sui gloriam hominumque salu-
tem eadem prouehantur. Vale. Halæ XX. Kal.
Decemb. M DCC VII,

